

06/12/1998

Nahas jalan raya menurun

SUBANG: Jumlah nahas jalan raya di seluruh negara menurun sebanyak 7.1 peratus sepanjang tempoh 10 bulan pertama tahun ini berbanding jangka masa yang sama tahun lalu.

Menteri Pengangkutan Datuk Seri Dr Ling Liong Sik, berkata penurunan itu yang kali pertama sejak 20 tahun lalu, membuktikan usaha pihak berkuasa mengurangkan kecelakaan jalan raya, sudah membuahkan hasil.

Berucap di majlis perasmian pameran sukan bermotor Motorsports 1998 di sini, semalam, beliau berkata, sejumlah 4,400 kemalangan maut berlaku sepanjang Januari hingga Oktober lalu berbanding 4,738 dalam tempoh yang sama tahun lalu.

Menurutnya, dalam tempoh yang sama, bilangan mangsa yang terbunuh dalam kemalangan turut menurun 6.9 peratus daripada 5,232 pada 1997 kepada 4,869 pada 1998.

"Setiap tahun, kadar kemalangan yang dicatatkan meningkat antara enam hingga tujuh peratus. Pemandu motosikal pula menyumbang 60 peratus daripada jumlah mereka yang terbunuh.

"Tetapi, buat kali pertama dalam 20 tahun ini, kadar itu dapat diturunkan walaupun jumlah kenderaan di jalan raya terus meningkat. Ini membuktikan kempen yang sentiasa dijalankan menerusi media, khususnya yang disasarkan kepada golongan penunggang, sudah berjaya," katanya.

Beliau mewakili Perdana Menteri Datuk Seri Dr Mahathir Mohamad, pada upacara perasmian pameran itu yang dianjurkan Le Proton Lima Sdn Bhd, di Pusat Pameran dan Perdagangan Antarabangsa Terminal 1, Lapangan Terbang Sultan Abdul Aziz Shah, semalam.

Hadir sama di majlis itu, Menteri Kebudayaan, Kesenian dan Pelancongan, Datuk Seri Sabbaruddin Chik dan Pengerusi Eksekutif Le Proton, Datuk Mohd Radzi Manan.

Pameran itu adalah acara pertama di terminal itu yang sebelum ini menjadi pintu masuk utama negara ini.

Ia juga pusat pameran terbesar dengan keluasan 34,400 meter persegi dan ruang pameran luar 130,000 meter persegi.

(END)